

那文毅公奏議

明文毅公二任直隸總督奏議卷六十六目錄

六十六

宣防疏濬

建修工作

那文毅公二任直隸總督奏議卷六十六

男容安恭輯

宣防疏濬

容安謹按道光六年二月二十三日

奏報永定河汎安瀾摺內奉

硃批覽奏欣慰

道光六年六月二十二日

奏臣於本月十九日接准軍機大臣字寄六月十八

日奉

上諭京師自六月初七日起雨勢未已永定河爲衆流

灑注現當大雨時行並聞桑乾河長水五尺有餘恐
致盛漲民田廬舍所關匪細必須加意保護著那彥
成嚴飭永定河道督飭廳汛各員常川駐工晝夜巡
防毋稍疎虞欽此仰見我

皇上慎重河防軫念災區之至意查永定河工現當伏
汛正值巡 喫緊之時該道張泰運前於五月二
十六日已率同文武廳汛各員駐工防守臣因大
名等各州縣所辦煮賑借籽事宜雖大局均已妥
協而隨時據報情形尙須熟加體察批飭遵辦若
駐工次相距較遠一時不克親身前往是以疊經

諄飭該道張泰運加意防範並令將水勢工段各情形不時馳稟核辦入伏以來曾據節次具報一切均屬平穩惟昨據山西大同府申報永定河上游桑乾河於六月十四日長水五尺四寸臣當卽飛飭該道上緊防護務保無虞旋據稟稱本月十五日夜至十六日河水陡長四尺七寸連底水長至一丈四尺九寸溜勢洶湧爲本年第一次盛漲兩岸各工埽段雖有刷動之處均經該道督率員弁人夫上下奔馳分投搶辦一律咸獲平安水勢亦旋就消落第晨下正當溽暑天氣時雨時晴水

勢長落靡常各工平險無定臣惟有嚴飭該道督同文武員弁往來兩岸晝夜相機查勘保護務於有埽之險工則隨在鑲修無埽之平工亦嚴行防守總使工段處處有人時時有備勿致稍有疎失以期仰慰

廑懷臣仍俟十二賑務以及截運漕糧各事宜逐件督飭辦理定局可以放心於七月初旬卽當起程赴工親督查勘屆時另行具奏謹

奏奉

硃批知道了

道光六年七月初八日

奏永定河工自入伏以後其初次水勢長發搶護平穩緣由前已奏蒙

聖鑒昨據永定河道張泰運稟報河水不時驟長各工

新險迭出

臣經

飛飭該道督率廳汛員弁分投

設法搶辦俱已保護平安水勢亦漸就消落查向

來伏秋大汛例應直隸總督

臣

親駐工次督同防

守迨嘉慶年間因地方事務繁多欽奉

諭旨勅令酌量往來查勘毋庸久駐工次以後督

臣

俱於

伏汛期內前來察看如果工程穩固卽行入都陳

奏仰慰

厘懷第念永定河爲衆流匯注工段綿長每以伏秋大
汎水勢長落本屬靡常埽工平險尤難預定每歲
習爲常例均於伏汎以內親往查看即使水平工
穩不過一時情形而秋汎方長往往業已面奏平
穩而河上以復出有險工豈可恃爲成局並恐廳
汎各員或因業經查勘不免意存懈怠轉非覈實
之道臣愚昧之見莫若嗣後每年或於夏至以前
預爲前往查其工段是否人夫齊備物料充實再
將籌備之法與該道等逐一親看妥爲商定俾免

臨時周章或於白露以後全河普律安瀾再行前
赴各工周歷查勘搶鑲工程是否逐段穩固足資
抵禦來春凌汛以便分別覈辦隨時入都面爲具
奏倘伏秋期內設遇水勢盛漲工段十分險要之
時仍當察其情形隨時馳往督辦如此不拘成例
不泥限期庶河工員弁時時加意留心籌辦既覺
周詳修守亦倍臻聚實且與原奏酌量往來查勘
諭旨尤屬相符似於慎重河防不無裨益謹

奏奉

硃批依議

容安謹按道光六年七月十六日

奏報永定河伏汎安瀾摺內奉

硃批覽奏俱悉

道光六年七月十九日

奏爲恭報微

臣

公出日期事竊永定河防汎事宜經

臣

奏准改於每年或夏至以前或白露以後督

臣

前往查勘分別籌辦一切以臻周密任案現在大名府屬各州縣自七月以來業經連次得雨據報早禾籽粒日見飽湛晚禾亦漸次結實約計秋成可望七分有餘粥廠已先後停撤民情極爲安貼

此時可以放心臣擬於二十日起身先赴蘆溝橋
晤詢永定河道張泰運河工一切情形卽就近趨
赴

御園跪領

訓誨後再行前赴河工周歷查勘回省俾河工員弁知
來往並無定期益可加倍小心仍不時差人明查
密訪不使稍有弛懈謹

奏奉

硃批知道了

道光六年八月初五日

奏稿

臣

於前月二十六日

陛辭後順道由永定河南岸行走初二日回省查看永定河各汛員所做歲搶修工程尙皆如式防護亦無疎懈河流順軌秋汛可保安瀾臣仍囑該道張泰運並廳汛各員實力防守不可稍存大意謹

奏奉

硃批知道了朕心稍慰

容安謹接道光六年八月二十五日

奏報永定河秋汛安瀾摺內奉

硃批覽奏欣慰道光七年三月十七日

奏報永定河凌汎安瀾摺內奉

硃批知道了

道光七年閏五月初四日

奏爲委員查明採買歲搶修料物實貯工所工段丈
尺亦無浮估恭摺具奏事竊照道光六年十月二
十日欽奉

上諭河工要務全在冬勘春修每年預發歲料銀兩飭
交工員乘時購備將料垛土牛堆積如式該河督向
於霜降水落之後前往沿河詳驗以杜架空浮鬆之
弊並將應辦春工周歷履勘悉心覈估一交春令次

第興修剋期竣事再行親往驗收查明料物用存確數以備伏秋雨汎之需卽遇有險工陡出備料足資應手是以鮮有失事著該河督等於例屆冬初及次年工竣時務須親歷河干詳加勘驗料垛必禁其虛鬆工程必期其堅實各宜不憚勤勞力除結習欽此查永定南北運三河每年應行歲修各工向於秋汎後各委道員覈實估計委員赴部請領銀兩辦料分貯工次於春融照估趕辦工竣覈實驗收報銷至臨汎搶修各工每年各預領銀兩採買物料以備搶鑲之用如有不敷借款墊發工竣覈實找

領歷經辦理在案今查各河歲修工程雖據各河道覈實估計興辦而所購料物等項曾否如數購備堆貯工所其工段丈尺有無浮估之處自應先行委員確查以杜剋扣偷減之弊經臣檄委清河道陶樑通永道慶綱天津道金洙分赴各工逐段挨查去後茲據各道稟覆本年歲修及臨汎搶修各工一切料物俱已照估採買齊全堆貯工所其所估工段丈尺均係亟應興辦之工亦無浮估之處等情稟覆前來惟有欽遵

諭旨嚴飭該河道督率文武各員趕緊興修務於汎前

一律完竣臣仍一面密訪嚴查不使稍有偷減以
重要工謹

奏奉

硃批知道了

容安謹按道光七年六月二十日

奏報永定河伏汎安瀾摺內奉

硃批知道了道光七年八月十四日

奏報永定河秋汎安瀾摺內奉

旨覽奏欣慰道光九年七月二十日

奏報永定河伏汎安瀾摺內奉

硃批覽奏均悉

道光九年九月初七日

奏爲恭報永定河形汎安瀾事竊照永定河土性純沙溜勢無定連年新險疊出倍於從前經臣嚴飭該道於各工出險處所節節安用夾壩逼溜總歸中泓幸得仰仗

皇上鴻福迄今六年均得三汎安瀾仍於伏秋大汎之前督率廳汎員弁實力巡防不得稍有疎懈茲據永定河道張泰運稟稱永定河自交秋汎以來河水節次盛漲溜勢湍激加以秋水搜根淘刷愈甚

七月下旬兩岸埽段紛紛報警安危祇爭呼吸幸
料物充足在工文武員弁兵夫分投搶辦一面加
鑲埽段一面補還原堤竭五晝夜之力並未片刻
歇手更兼夾壩逼溜中泓以後方得化險爲平茲
屆秋分之期水勢日漸消落蘆溝橋現存底水七
尺三寸堤埽開壩等工胥臻鞏固穩實具報安瀾
前來臣查乾隆五十九年至道光三年歷三十五
安瀾求安不可稍涉大意
載從未接連五年得慶安瀾者茲自道光四年以
來迄今六載均能保護平安且今歲秋汛疊漲陡
生新險又爲數年未有均經該道督同廳汛及協

防員弁奔逐於泥淖風雨中不遺餘力奮勉搶護
通工得臻穩固此皆仰賴

皇上福庇

河神默佑得以慶洽安瀾

臣

欣幸之餘倍深凜惕並

飭該道張泰運督率員弁照常小心防守毋稍疎
懈謹

奏奉

硃批另有旨

咨安謹按此

旨另載於推薦賢能門類

容安謹按道光十年三月十五日

奏報永定河凌汎安瀾摺內奉

硃批覽

道光十年四月初九日

奏爲永定河渾水南徙東淀直逼千里長堤恐妨運道親往查勘籌議修防事竊照天津以西四大河大清河在中卽係東淀下游其南爲子牙河又南爲南運河均由天津海河入海惟永定河渾水自西北來逼近大清河當日臣工奏議多言渾水不可入淀康熙年間奉

旨創立永定河兩岸堤工以束渾水雍正四年

特降諭旨著引渾河別由一道歸海經怡賢親王欽遵相

度導之北流繞王慶坨而東引入長洵河乾隆已

亥

高宗純皇帝親臨閱視將下口移條河之南由鳳河會大

清河入海

聖製詩註云數十年之後殊乏良策仰見

神謨遠運洞燭萬年嗣後長洵鳳河均已淤塞渾水由三

河頭橫漫而出尋至靜海縣境之楊芬港茲據天

津道李振翥稟稱自嘉慶二十三年永定河下游

南移將東淀楊芬港以下逐漸淤塞致令大清河之水與永定河渾水合而爲一俱由楊芬港東南之岔河經杜家道溝歸韓家樹正河行走杜家道溝卽千里長隄隄身也隄去河僅數十丈渾水未發則清水尙可以水抵水若當永定河盛漲之時河身旣不能容淀水亦不能敵東行後不能暢直衝長隄勢有必至一經漫溢越杜家道溝隄半里而遙串入子牙河越子牙河數十丈而串入南運河運道淤淺有悞漕運所係綦重且渾流橫出旁無隄岸上下數百里民田廬舍均受其害惟議挑

東淀工費甚鉅且大清河既受永定河渾水之害旋挑旋淤亦屬於事無濟請復永定河南岸堤工以塞其源疏永定河下口以掣其溜等語臣查道光四年直隸興辦水利

欽差工部侍郎程含章來直勘辦彼時卽因渾水淤墊擬估挑永定河下口至韓家村止並幫培舊埝堵築河槽以復舊制其時通盤籌算自南六工起挑挖中泓需費五十餘萬兩若撙節由范蠡口佔辦亦需二十餘萬兩且渾水易淤恐糜

帑鮮效是以中止閱今又復數年淤墊日甚工費愈

增

國家經費有常臣更不敢冒昧陳請惟有於千里長堤險要之處設法施工以資防禦當卽劄委永定河道張泰運前往相度形勢議稟覈辦茲據稟稱杜家道溝河面寬四五百丈水深一二三四尺不等中有橫淺泥淤不能疏濬緣永定河渾水淤墊致將大清河擠至千里長堤堤根是以水面如此寬濶現在堤出水面最矮者僅三尺堤南卽係子牙河南再南卽係南運河設汎期長水二尺斷難保護於運道大有關礙請將杜家道溝堤身大

加幫培多壤埽段以爲補偏救弊之法

臣

查永定

河下口旣因工費太鉅勢不能辦而挑挖東淀旋挑旋淤無益於事若稍事因循伏秋之間設有漫溢永定大清子牙南運合而爲一漕運民生關係綦重現屆四月轉瞬卽值汎期張奏運所稟辦法急則治標不過爲目前之計是否足資抵禦堪以敷衍數年并此外有無良法似應

臣

親往督同該道等查勘切實相機籌辦一俟勘定卽行奏

聞請

旨遵行

臣

於本月初十日自省起身謹

奏

道光十年四月十二日軍機大臣字寄奉

上諭那彥成奏永定河渾水南徙東淀直逼千里長堤
恐妨運道親往查勘籌議修防一摺永定河渾水入
淀東淀長堤胥受其害該督因東淀楊芬港以下逐
漸淤塞致大清河之水與永定河渾水合而爲一俱
由楊芬港之岔河經杜家道溝歸韓家樹正河行走
直逼千里長堤堤出水面僅三尺許恐汎期長水難
資保護於運道民田廬舍均有關礙現議幫培杜家
道溝隄身原係急則治標之法此外有無別策俾淀

不受淤水有歸宿該督現已親往履勘著詳細勘明
籌議覆奏到時再降諭旨

道光十年四月十八日

奏爲勘明渾水淤淀刷隄估辦土埽各工暫資抵禦
以防南溢妨運繪圖開單奏請

聖訓事竊

臣

具奏永定河渾水南徙入淀衝刷長隄恐

妨運道承准軍機大臣字寄道光十年四月十二
日奉

上諭永定河渾水入淀東淀長隄胥受其害楊芬港以
下逐漸淤塞致大清河之水與永定河渾水合而爲

一俱由楊芬港之岔河經杜家道溝歸韓家樹正河
行走直逼千里長隄隄出水面僅三尺許恐汎期長
水難資保護於運道民田廬舍均有關礙現議幫培
杜家道溝隄身原係急則治標之法此外有無別策
俾淀不受淤水有歸宿著詳細勘明籌議覆奏到時
再降諭旨欽此跪讀之下仰見我

皇上宸謨指示

洞燭機宜不勝欽敬欽服

臣

於本月十二日行抵天津

十四日帶同天津道李振翥永定河道張泰運先
赴天津靜海二縣交界之杜家道溝隄上察看形

勢乘坐小船測量河水直抵大清河下口次日復由雙口至王慶坨查看永定河舊下口淤墊情形緣永定河自乾隆年間入鳳河會大清河歸北運河入海迨鳳河淤塞渾水從南隄缺口直注三河頭爲淤淀之始嗣後渾水日往南徙東北愈形高仰道光三年由汪兒淀入大清河近年由三合會道溝一帶橫漫而出以致直衝杜家道溝楊芬港以東大清河節節淤淺瀾漫一派並無一定河身東西二淀之水均取道於岔河水溝之中杜家道溝本係隄內水溝面寬僅四丈隄出水面僅三尺

隄根已被汕刷一交大汎永定河水洶湧而至隄
不能禦勢必直灌子牙河橫穿南運河運河受淤
漕船阻滯其時再籌疏濬費

帑愈多補救無及道光三年

欽差侍郎程含章亦以費鉅未必得有把握未及議辦
此時爲正本清源之計自應以挑挖永定河下游
爲正辦第工費浩繁籌款不易且五月下旬卽交
伏汎爲期不及兩月勢難尅期完竣臣前奏擬於
杜家道溝隄工險要之處設法施工本屬急則治
標之法舍此亦別無長策復飭飭該道等悉心商

權以冀集思廣益或可計出萬全茲據該道等會
議稟稱此時疏挑永定河下口趕辦不及惟有就
杜家道溝隄身大加幫培以防漫溢多鑲埽段以
禦風浪請於當城村起至哈嗎窪止隄工一千六
百餘丈內分別幫頂幫坡加築子埝一律做成隄
出水面八尺五寸又於極險之處鑲做防風埽段
次險之處隄根汕刷捲埽塘護攔節估計共需土
方稽料銀三萬九千九十餘兩以爲目前補救之
法仍俟秋後籌議渾水去路另請核辦等語臣查
該道等所稟培隄鑲埽仍非一勞永逸之計而目

前救急別無辦法如大汎果有異漲亦難保護若
汎水與近數年不相上下隄頂加高水不致於過
隄大溜頂衝之處埽工尙足抵禦自應照估興辦
然受病原在渾水渾水不治終於壅潰此時形勢
尙難定局總俟秋令水落再行親往察看大溜形
勢熟籌妥善使清渾分行得復舊制爲是維時得
有主見卽行奏請

欽派大員會同勘議具奏以昭慎重至現辦工程係在
天津道所管境內永定河道熟諳工作且大清河
受永定河渾水之淤亦未便令張泰運置身事外

應責成天津道李振翥督同廳縣購料集夫永定河道張泰運帶同廳汛督辦工程夫料短缺惟李振翥是問工有草率惟張泰運是問勒限端午以前普律全完由臣另派大員驗收奏報大汛時責令兩道各派妥幹員弁分投駐工防守務保無虞該二道均係平日辦事可靠之人而於工需錢糧尤能慎重樽節所估銀數並無浮冒臣復於埽工內覈減銀二千二百九十兩實准銀三萬六千八百五兩零現飭該道等將應辦事宜先行籌備一俟欽奉

諭旨允准卽飭藩司在於司庫水利本款照數動撥委
員解交天津道衙門以供支放再臣於拜摺後卽
自天津起程回省謹

奏

道光十年四月二十一日奉

上諭那彥成奏勘明渾水淤淀刷隄請動項估辦土埽
各工一摺前據那彥成奏永定河渾水南徙東淀直
逼千里長隄恐妨運道降旨令該督於親往履勘時
籌議覆奏茲據奏疏挑永定河下口此時趕辦不及
惟有就杜家道溝隄身大加幫培並多鑲埽段以資

抵禦著照所請將現辦各工責成天津道李振翥永定河道張泰運分別購料集夫督辦工程如有短缺草率惟該二道是問務於端午以前普律全完工竣覈實驗收奏報所有估需工料銀三萬六千八百五兩零卽著在司庫水利本欵內照數動撥該部知道

容安謹按道光十年七月初四日

奏報永定河伏汎安濶摺內奉

硃批知道了

道光十年九月初三日

奏爲恭報永定河秋汎安濶事竊照永定河亘長四

百餘里土性純沙溜勢靡定加以舊工新險層見疊出經臣嚴飭該道於各工出險處節節添用挑水壩逼溜不使旁趨本年伏汎期內河水共長十一次各工埽段陡壑之處甚多該道督率文武員弁竭力搶護平穩前已

奏報在案一面嚴飭防守秋汎不得稍有疎懈茲據永定河道張泰運稟稱自交秋汎以來河水又復驟長八次其最大者七月初旬長至一丈六尺九寸拍岸盈隄處處險要加以秋水搜根或全河坐灣或大溜側注兩岸埽段紛紛蟄動實爲非常盛

漲幸得門閘過水宣洩並上年

奏添備防稽料得資應手在工文武員弁兵夫晝夜
分投搶辦更兼挑水壩逼溜中泓始得保護一律
平穩茲屆秋分水勢日漸消耗蘆溝橋現存底水
七尺一寸提埽閘壩等工悉臻鞏固具報安瀾前
來臣查永定河自道光三年後迄今七載俱能保
護平安卽今歲伏秋二汛疊次盛漲新險林立情
形頗爲危急均經該道督率廳汛及協防委員奔
馳於風雨泥淖中不遺餘力奮勉搶護化險爲平
通工得臻穩固此皆仰賴

皇上福庇

河神默佑得以慶洽安瀾

臣

欣幸之餘倍深凜惕仍

飭該道張泰運督率員弁照常小心防守毋稍疎

懈謹

奏

容安謹按此

旨另載於推薦賢能門類

道光十年九月初三日

奏爲永定河下口形勢大有轉機俟來春興辦更可

節省請先撥項購備料物以濟工需事竊照永定

河渾水南趨入淀直逼千里長隄隄根恐橫穿子
牙河直灌南運河有妨漕運經臣於四月間親往
履勘估辦杜家道溝一帶土埽各工以禦大汎奏
明渾水不治終於壅潰爲正本清源之計自應以
挑挖永定河下口爲正辦俟秋令水落再行親往
察看大溜形勢熟籌妥善奏請

聖明指示勘議辦理在案惟時

臣

親歷下口查得南岸

隄工至南八工而止以下二千餘丈向無隄埝迤
東始有南遙埝是以全河之水均於無隄處南趨
入淀當飭永定河道張泰運於該處接築隄埝通

溜攔水俾河流漸次東注於興辦下口當有裨益
嗣據該道派員陸續估辦自南八工十七號起至
汪兒淀創築新隄一千七百零八丈其汪兒淀以
下仍留入淀金門三百五十餘丈以防下壅上潰
之虞又於南遙埝二千九百二十丈內修補殘缺
並添築埽壩等項共用銀三千九百三十餘兩稟
經臣批准俟辦理下口併案具奏動項歸欵自接
築新隄以後臣不時派委員弁赴工查看束水逼
溜極爲得力大汛期內入淀之水不過三四分其
餘六七分大溜均已東注再加疏濬可冀河流復

歸故道此皆仰賴

皇上鴻福

河神默佑溜勢遷轉實屬大好機會乘此時將入淀金門趕緊堵閉一面將新隄南遙埝一律加高培厚使渾水不復南趨洵當急速辦理惟近隄有王慶坨村莊居民三四千戶業已被水圍繞若卽將入淀金門堵閉全河之水併力散漫村基勢成澤國雖瀕河村莊例應遷徙而該村人煙稠密安土重遷殊多不便且防河所以衛民今因治河而使該村民流離失所亦非所以仰體

聖主惠愛黎元之意是以未卽施工茲當水落後飭該道先往履勘體察情形據稟自大范壩口河流坐灣處取直佔挑引河一道使大溜直注下口河身在王慶坨村北數里以外該村可無浸淫之患卽於引河頭截堵河槽進占加鑲塞其入淀之源南八工以下新隄及南遙埝一律加高培厚防其漫溢之路如此估辦以目下情形而論秋汎甫過水未全涸土係稀淤施工較難方價亦貴計培隄挑河築壩三項共需銀十二三萬兩若本年先將需用料物購齊隄埝有得土處先行派員分投幫培

其挑河築壩等工緩至來年春夏之交時近桑乾
辦理更可節省約需銀六萬餘兩可敷工用具稟
等情臣查道光四年

欽差侍郎程含章查辦直隸水利擬挑永定河中泓疏
濬下口估需銀五十餘萬兩若由范蠡口估辦亦
需銀二十餘萬兩茲就大范蠡口偏北挑河繞越
王慶地村莊既可保護民居無事遷徙渾水復行
故道淀河不致受淤工費又復節省一舉而三善
俱備實爲事機極順之時因現擬挑河築隄之處
稀淤不能立足難以確估應俟春融飭令該道覈

奏
實估報由

臣

親往覆勘開單

奏辦銀數總可有減無增至來年興舉此工需用稽
料自應乘此時秋料登場購備足用以免居奇其
隄埵有得土處於秋令未凍以前分投派員培築
該道所稟均爲節省工費起見似應允其所請合
無仰懇

皇上天恩俯准在於司庫水利項下動撥銀三萬兩飭
發該道領回先行備辦物料土方所領銀兩卽在
來年估報銀內覈實開除謹

奏

道光十年九月初六日奉

上諭那彥成奏籌辦永定河下口工程請先撥項購備料物一摺永定河下口據該督勘明應於大范壘口估挑引河一道並將新隄及南遙埝一律加高培厚約需銀六萬餘兩請先購備稽料以資興築著照所請准於司庫水利項下動撥銀三萬兩飭發永定河道領回先行備辦料物土方卽於來年估報銀內覈實開除以濟工需該部知道

容安謹按次春 先公罷職未及收工

道光十年九月十五日

奏爲辦理杜家道溝隄工節省椿木例價銀兩歸還
司庫事竊照千里長隄杜家道溝土埽各工前據
天津道李振翥永定河道張泰運估計土方工料
銀數稟經臣奏明動項飭委該道等興修嗣據報
工竣又經臣委員驗收據實具

奏一面飭令將實用銀數照例造冊詳候

題銷在案茲據李振翥稟稱原估埽工內有松木門
椿五千三百四十根因爲數過多尺寸較大天津
及附近地方向無此項松木若俟遠道採買工程
期限甚迫恐致貽悞當與永定河道張泰運彼此

籌商改用楊木椿一律簽釘結實亦足以資捍衛
查松木椿每根例價銀一兩七錢三分四釐應需
銀九千二百五十九兩五錢六分楊木椿每根例
價銀六錢止需銀三千二百零四兩共計節省門
椿價銀六千零五十五兩五錢六分應卽解還司
庫據實造冊請銷等情前來臣查埽工簽釘松木
門椿係照五道成規覈估及至興工因所需松木
過多該處及附近地方購覓維艱工程緊急經該
道等改用楊木椿簽釘既足以資捍衛並經臣委
驗均屬堅實自應准其改用以節糜費飭將節省

松木例價銀六千五十五兩零解還司庫歸款並
於

題銷冊內聲明以歸覈實再此次趕辦隄埝各工該
道等分飭天津府同知秦承霈北岸同知蔣宗壩
天津縣知縣沈蓮生靜海縣知縣張孔道天津縣
縣丞張欽祖分投購料集夫及派段督率鑲築尅
期報竣接防伏秋大汛通工得臻穩固辦理均著
有微勞應請俟來年辦理永定河下口挽歸故道
之後查明該員等如能始終奮勉再行奏懇

恩施謹

奏奉

硃批該部知道

道光六年三月十二日

奏爲請動項疏築堤河要工以資保衛事竊照香河寶坻二縣連年被水歉收皆由隄河殘缺淤淺民力不能修濬所致前據委員務關同知周衡等勘得北運河上游香河縣所轄牛牧屯村接連官堤之北向有民築土埝一道長一千餘丈原以抵禦運河泛濫使水向北趨滙入五河而設嗣因歷年河水盛漲被衝缺口六道共長二百餘丈每遇水

發卽由缺口東灌浸浸香河及寶坻西北鄉一帶
以致災歉頻仍民力凋敝必須趕緊修築完整俾
免水患又查五河之魯家橋現有淤灘二段致令
漚歸之水不能暢洩亦應挑挖深通庶資利導由
此順流而下至寶坻縣之東南鄉地勢最爲低窪
受水之患有三一因袖針河兩岸自苑洪橋起至
八門城止舊埝衝刷過半河身淤淺枯槁窪漚水
無所歸束遂泛濫於東南鄉一自八門城起至薊
運河寧河縣交界之江濱口止堤工間段殘缺內
有張窩頭村後爲衆水歸海之路地勢尤窪現無

堤埧以致蘄運諸河之水不趨於海而直灌於東
南鄉一因青龍灣引河北岸自西老鴉口起至鮑
魚淀止堤工早殘過甚其間缺口亦復不少一遇
河水泛漲卽由缺口內注東南鄉該處四百餘村
被患獨深困苦尤甚應將袖針河兩岸之苑紅橋
起至八門城止修築土埧二道以禦泛溢再自八
門城起至蘄運之寧河交界江窪口止修築南堤
一道使蘄運諸河之水不能內灌再自西老鴉口
起至鮑魚淀止所有殘缺堤埧坑塘逐段修補使
運家莊一帶河水不復倒漾由淀直達於海以上

諸工本應民間修築惟該處疊被灾歉數歲無收
此項工鉅費繁斷非民力所能舉辦亟應動

帑興修方足以保田廬而蘇民困茲計香河境內築
堤挑淤估需工料銀一千八百五兩零寶坻境內
補築堤埝估需工料銀二萬四千二百三十兩零
二共估需銀二萬六千三十五兩零稟請覈辦前
來_臣因恐該委員等勘估工段銀數或有未盡確
實之處復經飭派通永道李德立親往覆勘委係
亟不可緩之工所估工料銀數逐加核計亦屬撙
節無浮由司覈明開單請

奏前來臣查直隸水利前歲發

帑興修嗣因高堰興工是以中止惟念此項水利既已估修此時若槩與停止則前功又屬虛作目今自應先其緊要利民之處覈擇興修今所請堤河各工均關民瘼若不趕爲辦理不特香河與寶坻西北鄉水患難除而寶坻東南鄉形如釜底但遇夏秋衆水滙注輕則被歉重則成灾受害尤無底止自應分別挑築以衛民生所估工段銀數旣據該道李德立覆勘屬實並察看民情無力修復合無仰懇

聖恩俯准動項興修應需銀兩卽於上年水利大工餘
剩銀內如數動撥責成通承道督率趕辦限於大
汛前一律完竣報候驗收如有草率偷減卽行據
實嚴叅務期工歸實用

帑不虛糜斷不任稍有弊混應並飭造具估勘冊結
並該道親勘加結照例分別

題咨謹

奏

道光六年三月十七日奉

上諭那彥成奏請動項疏築隄河要工一招直隸香河

寶坻二縣地勢低窪因隄河殘缺淤淺以致連年被
水歉收自應將各工一律興修以資保衛茲據該督
查明香河境內牛牧屯村等處應行築隄挑淤估需
工料銀一千八百五十兩零寶坻縣境內袖針河等處
應行補築隄堰估需工料銀二萬四千二百三十兩
零共需銀二萬六千三十五兩零此項工程向係民
間修築惟該處疊被災歉民力難以舉辦着照該督
所請准其將需用銀兩於上年水利大工餘剩銀內
如數動撥給發卽責成通永道督率趕辦限大汛前
一律完竣覈實驗收報銷如有草率偷減卽行嚴叅

懲辦該部知道摺單併發

道光六年四月二十二日

奏爲遵

旨勘估寶坻縣引河南岸殘缺堤工應請動項一併修
築事竊照道光六年三月二十六日奉

上諭御史王世綬奏寶坻縣引河南岸殘缺堤堰等工
請一併修築一摺前據那彥成奏動項疏築堤河各
工請將寶坻縣青龍灣引河北岸殘缺堤堰坑塘官
爲修築茲據該御史奏該縣青龍灣引河南岸缺口
不少與北岸同惟里數稍減覈計土方有減無增著

那彥成確查該縣青龍灣引河南岸自八道沽起至東淀莊南之葦壩止是否應行一律興修據實覆奏欽此當卽欽遵飭令該管河道馳往查勘去後茲據護理通永道徐寅第勘得寶坻縣青龍灣引河南岸自八道沽起至東淀莊南之葦壩止計長三十餘里舊堤高一二三尺及四尺餘寸不等並有僅存堤形與河身相平者前經委員勘估香河寶坻二縣堤河各工時因該處附近引河之四十八村莊曾於乾隆十七年奉文減賦該委員等擬令減賦村莊自行修堤以期節省經費是以未將南

岸堤工一併估辦今蒙

諭旨飭查其坍塌殘缺之處自應趕緊修築惟察該處情形亦因屢被災歉民困未舒且費鉅工長非一時民力所能舉辦應請一併動

帑修築俾免向隅查南岸地勢較北岸稍高計南堤築至高六尺頂寬一丈底寬四丈足資保衛隨覈實估計自八道沽村東起至葦壩迤南之舊堤頭止共工長五千四百九十丈逐段加培及堵築缺口坑塘共需銀九千七百九十一兩零開單稟請

覈

奏前來臣查此項隄工既據該道勘明亦應及時修築合無仰懇

聖恩俯准一律動項興辦以卹民力而資捍禦惟現距大汛不遠應與該縣北岸隄河各工同時趕辦仍責成通永道先行動項督率該縣上緊修築務於大汛以前一律完竣報候驗收倘有草率偷減遲悞卽行據實嚴叅所需銀兩仍於司庫上年水利大工餘剩銀內撥還歸款飭該道造具估勘冊結照例分別

題咨理合繕具工段丈尺銀數清單恭摺覆

奏謹

奏

道光六年四月二十六日奉

上諭那彥成奏勘估寶坻縣引河南岸殘缺隄工請動
項修築一摺前因御史王世綏奏直隸寶坻縣青龍
灣引河南岸缺口不少應行一律興修當交該督確
查茲據勘明自八道沽村東起至葦壩迤南之舊隄
頭止共工長五千四百九十丈亟應逐段加培並堵
築缺口坑塘以資捍衛惟該處屢被灾歉民困未舒
且費鉅工長一時民力更難舉辦加恩著照所請所

有估需銀九千七百九十一兩零准其動項發給仍
責成該管通永道督率該縣上緊修築於大汛前一
律完竣該督飭派明幹大員前往驗收務期實有裨
益不致虛糜倘有草率偷減遲悞卽著據實嚴叅所
需銀兩仍於司庫上年水利大工餘剩銀內撥還歸
欵該部知道

道光六年十一月二十三日

奏爲委員驗收香河寶坻二縣堤河各工辦理完竣
事竊照香河寶坻二縣境內堤河殘缺淤淺致連
年被水歉收急須分別挑築以衛田廬而蘇民困

前經飭委通永道李德立勘估香河寶坻二縣牛
牧屯等處堤埝各工共估需銀二萬六千三十五
兩零又寶坻縣引河南岸堤工飭據護理通永道
徐寅第欽遵

諭旨飭查續估共需銀九千七百九十一兩零經臣先
後奏蒙

俞允飭令動項趕辦在案嗣據護理通永道徐寅第具
報香河寶坻工程及續估各工陸續完竣臣卽委
候補府曾俊馳往查驗去後旋據稟報前赴香河
寶坻二縣各工所按照原估工段逐一丈量所做

長寬高深丈尺均與原佔相符其舊有缺口坑塘
悉皆如式填墊並無草率偷減情弊惟今歲夏雨
過大寶坻縣之袖針薊運兩河新修堤工間有數
段地處窪下被水淹浸將來水勢消落恐不免汕
刷殘損已飭令該縣覆加確勘如式修補整齊等
情臣查此項工程因民力不能舉辦奏明發

帑興修豈容稍事含混當卽嚴飭承辦工員蔣超曾
按照原估丈尺一律賠修完固稍有草率浮冒卽
行叅辦嗣據稟報趕修完竣當經飭委東路廳辛
文止前往細勘各工均已如式辦竣覈實驗收由

通永道具詳請奏再修築堤壩各工前准工部咨
填墊坑塘應於原奏內分晰聲敘等因今香河縣
修築牛牧屯民埝填墊坑塘原估時未將工段丈
尺分晰聲敘行據查覆開單併送前來臣覆覈無
異並飭另行造冊

題銷謹

奏奉

硃批工部知道單併發

道光六年十月初七日

奏爲勘估藁城縣境內堤河各要工亟須修濬以防

水患事竊查正定府屬之藁城縣西北爲滹沱河
下游向由縣境五里莊北流注東南距縣城六七
里嗣因河流遷徙北岸沙淤地勢北高南下水由
南趨直逼城垣乾隆五十六年河水漲發衝潰土
城一百餘丈漫溢入城民捐護城土堤一道計長
三百九十丈迨道光二三年間河水異漲堤工衝
缺直注縣城經該縣倡率士民於衝缺處所捐築
月堤一道併將舊堤加用防風埽段軟鑲培補以
資捍衛現在各工多已蟄陷殘缺河流日趨日近
每遇汎水盛漲勢甚危險非僅修復堤埽所能抵

禦工費較繁非民力所能舉辦由該府縣等稟請
委勘估計當卽飭委現署正定府候補知府嚴炳
前往會同該前府金洙逐細勘估據勘得護城堤
工連年衝刷殆盡月堤旣甚卑薄埽工亦復蟄動
而城垣衝缺之處正當河溜坐灣頂衝勢甚危險
本年夏間河水陡漲將防風埽衝動過半該縣趕
緊搶護水未入城而埽工以西迎溜頂衝較前更
險亟應添築魚鱗埽工八段共長四十六丈並舊
有護城堤三百九十丈月堤一百零五丈一律加
高培厚水小之年尙可暫資保護設遇水大年分

河流相距城根僅止里許實非堤壩所能防禦因查渚沱河形勢自該縣城西八里之陳家莊大溜直趨東北因近城一二里北岸淤沙阻其去路水勢遂折注南下直逼城垣莫若順水之性於沙磧以北就河流直趨東北之勢挑挖引河一道計長七百丈口寬八丈底寬三丈深一丈並擬新挑河尾添做草工盤護一段以免衝刷計長二十一丈寬一丈五尺深一丈俾全河大溜以東流爲去路不致繞向東南齧蝕城垣似可永保無虞通計各工共估需工料銀七千七百三十六兩零並據勘

明該處土性浮鬆不能攔河築壩而浮水純涉動輒停淤若不將挑引河加以歲修仍不免隨時淤淺本係民修之工應請於每年伏汎以前查照舊章勸諭士民由地方官督率疏濬務令引河日見深通不致淤阻以杜水患等情由藩司屠之申覈明開單請

奏前來

臣

查一切工程近因軍需河務費用浩繁經

戶部奏奉

諭旨概停三年再行興舉欽此惟前項各工係因保護城垣民力既難舉辦官工又已暫停設遇汎水泛

溢無可抵禦城垣倉庫以及民田廬舍在在可虞
設有疎虞轉增鉅費既據勘明實係刻不可緩之
工應請准其估辦合無仰懇

聖恩俯准動項修濬如蒙

俞允所需銀兩卽在辦理水利工程餘剩銀兩動撥責
成署正定府知府嚴炳督率分別疏築工竣報候
驗收如有草率偷減情弊卽行據實叅辦仍於每
年伏汎以前查照民修舊章將所挑引河疏濬一
次作爲歲修以免淤淺並飭造冊

題咨謹

奏

道光六年十月十二日奉

上諭那彥成奏隄河要工請動項修濬一摺直隸藁城縣西北爲滹沱河下游因河水發漲直逼城垣隄工多被衝刷據該督委員勘明應添築魚鱗埽工八段並挑挖引河一道添做草工盤護一段以資捍衛其舊有護城隄月隄應一律加高培厚共估需工料銀七千七百三十六兩零此項工程本係民間捐修惟需費較繁民力未能舉辦著照所請准其於辦理水利工程餘剩銀內動撥責成署正定府知府嚴炳督

率經理分別疏濬工竣覈實認真驗收如有草率偷減卽行據實叅辦仍於每年伏汎以前查照民修舊章將所挑引河疏濬一次作爲歲修以免淤淺該部知道單併發

道光七年六月二十日

奏爲藁城縣境內堤河各工辦理完竣委員驗收恭摺奏

聞事竊照藁城縣境內護城堤工連年衝刷殆盡勢甚險要亟應添築魚鱗埽段并挑挖引河以資保衛前經委據署正定府候補知府嚴炳會同陞任之

該前府金洙勘估共需銀七千七百三十六兩零

經臣奏奉

俞允動項辦理在案嗣據候補府嚴炳具報督同藁城

縣知縣石梁領銀承辦於本年五月二十一日照

估一律趕辦完竣

臣

卽委現任正定府知府白明

義前往查驗去後茲據稟報前赴工所按照原估

工段逐一丈量所做長寬高深丈尺悉與原估相

符並無草率偷減情弊等情由清河道陶樾覆覈

移咨藩司屠之申詳請覈奏前來

臣

覆覈無異並

飭另行造冊

題銷謹

奏奉

硃批知道了

道光十年二月二十五日

奏爲直省佔挑漳河故道等議商捐並借廉捐辦事
竊查上年八月間漳河水勢異漲由豫省內黃縣
之慶豐莊奪溜折而南趨挾洹水併歸新衛河下
注以致直省之漳河故道同時斷流淤塞經河南
撫臣楊國楨

奏明將豫省新漕改由新衛河行走並咨商到臣因

查新衛河爲鹽運所關而漳水挾沙入衛恐日久
亦形淤墊尤慮夏秋盛漲之時不能容納泛濫爲
患不可不起緊挑復漳河故道以濟漕艘而便鹽
運隨委大明道李德立會同河南委員候補道張
坦等履勘籌議除豫省境內估挑工程需銀六萬
七千餘兩經河南撫臣奏請借項興辦業准咨會
在案所有直境河道地居下游自當同時挑濬以
期順流而歸畫一臣復派委熟諳工程之永定河
北岸同知蔣宗堉隨同大名道府周厯履勘自直
隸交界張兒莊起至岔河嘴止綿長七十餘里查

明淤塞段落共計長四千五百一十四丈應挑土
九萬四千三百三十九方二尺仿照豫省所估方
價以挑河之淺深定價值之多寡樽節確估共需
銀一萬九千八百七兩七錢二分挑出之土卽堆
於南岸十丈外接築土埵以資捍衛惟直省缺苦
差繁旣難派徵於民又難攤捐於通省各官似此
有限工程亦未便遽請動

帑隨飭司會同大名道府籌議去後茲據布政使顏
伯燾詳稱以長蘆南運商人查慶餘等曾赴大名
道稟請速挑漳河以利鹽運該道因新衛河本係

專爲運鹽而設從前該商捐項挑挖力尙能支今
議請挑復漳河卽以保全衛河洵與鹽運有益隨
與運司互相籌商據長蘆南運商人情願按引公
捐銀一萬四千兩以助工需卽由運司催收撥解
下不敷銀五千八百七兩零大名道府均有守土
之責情願各捐養廉銀二千兩大名縣亦願捐養
廉銀一千八百餘兩俾足公用所有該道府縣願
捐銀兩請先由司庫墊發自本年夏季爲始分作
十年在於每年應得養廉內坐扣歸欸免其報銷
等情前來臣查復漳卽以保衛旣便漕運亦利鹽

商而附近之民田廬舍更可無虞水患誠一舉而三善備覈其估報土方工價尙屬撙節無浮旣據鹽商情願認捐銀一萬四千兩係急公利運起見卽由運司撥解以資工用其餘銀五千八百七兩零據大名道與該府縣籲請借廉捐辦分年攤扣歸欸亦屬以公濟公自應准其卽於司庫耗羨項下借撥自本年夏季爲始分作十年在於支領養廉銀內按季坐扣庶要工有濟而借項不致虛懸仍卽責成大名道稽查督辦務與豫省同時興工統限本年三月底完竣不准遲延草率此係官商

捐辦之工應請免其報銷並咨會河南撫臣籌辦

謹

奏

道光十年二月二十八日奉

上諭那彥成奏估挑漳河故道籌議商捐並借廉捐辦
一摺上年秋間漳河水勢異漲由豫省內黃縣之慶
豐莊奪溜南趨挾洹水併歸新衛河下注以致直省
之漳河故道斷流淤塞據該督查明應與豫省同時
挑濬自張兒莊起至岔河嘴止應挑段落共估需銀
一萬九千八百七兩零由官商籌議捐辦著照所請

准其將蘆商捐銀一萬四千兩由運司撥解其大名
道與該府縣懇借廉捐辦銀五千八百七兩零卽於
司庫耗羨項下借撥自本年夏季爲始分作十年在
於應支養廉銀內按季坐扣該督卽責成大名道稽
查督辦務與豫省同時興工統俟本年三月底完竣
不准遲延草率此項工程係官商捐辦著免其報銷
該部知道

道光十年四月二十六日

奏爲挑復漳河故道工竣委員驗收恭摺奏
聞事竊照上年秋間漳河水勢異漲由豫省內黃縣之

慶豐莊奪溜南趨挾洹水併歸新衛河下注以致
直省之漳河故道斷流淤塞經臣查明應與豫省
同時挑濬自張兒莊起至岔河嘴止應挑工段共
估需銀一萬九千八百餘兩蘆商認捐銀一萬四
千兩不敷銀數由大名道府縣捐廉補足奏蒙
諭旨允准與辦在案嗣據大名道府具報於本年三月
二十六日一律修理完竣當經劄委候補直隸州
知州白明義前往查驗去後茲據稟稱查得漳河
工程自豫直交界之張兒莊起至二窖村西止又
自東樓底起至岔河嘴止工長四千五百餘丈分

二十一段挑挖逐一丈量均係照估如式深通並無草率偷減現在水勢極爲暢流繪圖開單稟報前來臣查挑復漳河卽以保全衛河於漕運鹽運均有裨益此工綿長七十餘里節節淤墊挑挖頗爲不易且奏限緊迫必須多僱人夫分段趕辦方免貽悞經臣責成大名道李德立督同該府辛文祉稽查妥辦今已依限完竣委驗如式辦理尙爲迅速該道府均係分內應辦之事未敢仰邀議敘惟大名縣衛河縣丞屬維梁候補未入流葛若熿經該道府派駐工次稽察彈壓該員等晝夜在工

往來風雨泥淖之中率同夫役趕緊挑挖得與豫省同時告竣洵屬奮勉出力可否仰懇

天恩將衛河縣丞厲維梁以應陞之缺陞用候補未入流葛若燾儘先補用以示鼓勵之處出自

聖主鴻施謹

奏

道光十年四月二十九日奉

上諭那彥成奏挑復漳河故道工竣酌保出力人員一摺上年漳河故道淤塞經該督奏請興工挑淤茲據查明自豫省交界之張兒莊起至二密村西止又自

東樓底起至岔河嘴止工長四千五百餘丈俱已挑挖深通依限完竣辦理尙爲迅速所有在工出力之衛河縣丞厲維梁著以應陞之缺陞用候補未入流葛若燦著儘先補用以示鼓勵該部知道

道光十年三月三十日

奏爲近隸省城之河道橋座查明淤淺坍塌過甚請動項挑修事據布政使顏伯燾清河道徐寅第詳稱省城南門外舊有府河一道自西至東計長五十餘里上通滿城縣一畝泉下接安州依城河直達天津凡有兵米鹽艘以及商販船隻皆由此河

駛行到省又城北相距十餘里之徐河舊有石橋一座係南北通衢往來差務文報以及商賈行旅絡繹不絕此二處河橋係附近省垣水陸要道遇有淤墊坍塌損厯准請

帑挑修有案本年二月間據清苑縣先後詳報府河自乾隆五十八年動項挑挖以來距今已三十餘載河身狹窄流沙停積現在節節淤淺每遇兵米鹽艘併商販船隻非起岸剝運卽築壩浮送甚費周章且恐將來上游水漲之際猝難容納宣洩致有漫溢之患必須趕緊疏濬以順河流而利舟楫

並查徐河橋亦因年久失修以致橋面柁檁虧朽
金牆雁翅磚石各工全行敝裂溜圯灰土泊岸衝
刷成坑車馬往來均係繞道行走亟宜拆卸另行
修建俾差務文報暨往來行旅均免阻滯各等情
當經飭委因公在省之務關同知邵楠滿城縣知
縣李濂分往查勘去後茲據該委員等會同清苑
縣沈倬厚週歷勘明府河自南關外南水橋起至
安州界止共計長九千一百餘丈內除現在通暢
三千八百餘丈毋庸估挑外實計淤淺應行挑挖
五千三百六十七丈照例摺節確估計應挑水旱

泥濘土二十一萬一千餘百方共需方價銀一萬九千六百六兩零又勘明徐河橋長七丈五尺寬二丈二尺係五空成造拆卸換料修建完整按例覈估共需工料銀四千六百九十八兩零各開估單出具印勘各結由府覈明詳請具

奏前來臣查府河與徐河橋一係要津一當孔道洵爲水陸通行之區既據該委員等會同勘明實已淤淺坍塌自應卽行分別挑修以利舟車而使商旅覈其估報土方工料銀數均屬無浮應請准其辦理合無仰懇

皇上天恩俯准動項興修所需橋工銀四千六百九十
八兩零卽在清河道庫貯滹沱河生息項下動撥
挑河土方銀一萬九千六百六兩零查有司庫鹽
勛加價水利生息項下可以動用飭撥清河道支
領卽責成該道督率趕緊集夫購料興工務使工
歸實用

帑不虛糜倘有草率偷減情弊卽據實嚴叅工竣報
候驗收送到估單送部查覈並飭造冊

題銷謹

奏

道光十年四月初三日奉

上諭那彥成奏請挑修近隸省城之河道橋座一摺直隸保定府南關外府河一道淤淺過甚徐河石橋一座亦形坍塌該二處爲水陸通行之區經該督委員勘明亟應分別挑修以利車楫著照所請所有估需挑河土方銀一萬九千六百六兩零准其於司庫鹽筋加價水利生息項下動撥估需橋工銀四千六百九十八兩零准其於清河道庫貯滹沱河生息項下動撥卽責成該道督率趕緊興辦工竣報候驗收倘有草率偷減卽據實叅辦該部知道

建修工作

道光七年八月十四日

奏爲勘明州縣監獄亟應動項修理事竊照各屬監獄十年限外坍塌例准動項興修茲據藩司屠之申呈稱查武清保定撫寧昌黎河間故城開州南樂清豐磁州赤峯深澤武強隆平等十四州縣監獄均因年久失修加以道光二三年大雨之後又已數年現在房屋欹斜墻垣敝裂難以久支據各州縣先後詳請委勘修葺當經移飭該管道府廳州親往確查委員覆勘估計實因年久將就坍塌

急應修整委係刻不可緩之工由司彙開清單具
詳請

奏前來臣查各項工程前因籌辦軍需經戶部議奏
概停三年再辦自應遵照一概停止惟各屬監獄
係犴狴重地輕重囚犯所羈必應完整堅固方無
他虞與別項工程不同既據各州縣紛紛請修且
均逾保固限外與請修之例相符查業經勘明應
修之武清等十四州縣監獄統計估需工料銀一
萬三千六百六十六兩六錢七分五釐逐加覆覈
均係撙節估報尙無浮冒應請准其估辦所需工

料銀兩查司庫存貯城工京市平銀一萬二千兩
零又河工各案存銀八千七百餘兩本係扣存辦
工之款並非正項錢糧以之修監亦屬以公濟公
如蒙

俞允飭司在於前二項銀內照數動撥分別給領興工
趕辦仍飭造具估勘冊結分別

題咨事竣委驗覈實造冊報銷並將銀數清單咨送
工部恭摺具

奏伏乞

皇上勅部覈覆施行謹

奏

道光七年八月十八日奉

上諭那彥成奏勘明州縣監獄請動項修理一摺直隸武清保定撫寧昌黎河間故城開州南樂清豐磁州赤峯深澤武強隆平等十四州縣監獄因年久失修房垣坍塌經該督查明均逾周限著照所請准其修葺所有估需工料銀兩統計一萬三千六百六十六兩六錢零准其於司庫存貯城工京市平銀及河工各案存銀項下照數動撥分別給領興辦事竣委驗覈實報銷該部知道

道光九年十二月初五日

奏爲官民捐修石道工竣仰懇

聖恩分別獎勵事竊查萬全縣之張家口北通蒙古諸部落西達伊犁等處係外藩入

覲經由孔道旗民襍處商賈雲集實爲邊疆保障該處上下兩堡道路崎嶇遇雨雪停潦之時往來車馬傾覆堪虞非一律鋪石難以坦平經久該縣現任知縣張慶成目擊情形力圖修理於道光七年冬間首先倡捐制錢二百三十千並選擇公正紳士分頭勸捐各商民亦俱踴躍急公先後共捐輸制

錢二萬二百五十千責令各公正鄉民分爲經理
於八年春間採石集夫興工修砌至本年秋間普
律完竣統計上下兩堡鋪成石道接長五里共用
條石九千一百餘丈實用工料制錢二萬四百八
十千文稟經宣化府暨口北道於因公赴口之便
親歷履勘該二堡道路委已修理整齊工堅料實
開造捐戶姓名錢數清冊請將捐輸最多之戶同
勸辦出力之員分別獎勵由藩司覈議詳

奏前來臣查張家口爲關疆要路行旅所經外藩觀
瞻攸繫該商民等一經勸捐踴躍樂從輸將恐後

於匝年之內成鉅萬之工其好義急公殊堪嘉尚
查定例修城築堤等項公事士民捐輸銀三四百
兩者據實奏請給予八品頂帶如本有頂帶人員
於奏請時聲明聽部另行議敘捐至一二千兩及
三四千兩者題請從優議敘等語今修辦道路與
修城築堤事同一例除捐數在三百兩以下者另
行照例分別賞給匾額花紅外惟現充張家口商
總萬全縣民人馬驥山西民人余淦等二名各捐
制錢一千串又監生常秉周民人張大謨各捐制
錢三百二十千貢生常麒麟童生霍權各捐制錢

三百千以上六名均合銀數在三四百兩以上應請

賞給八品頂帶又籍隸山西候選衛守備許漸達捐制錢六百千合銀在五百兩以上係有職人員應請旨交部議敘至萬全縣知縣張慶成前於道光六年勸捐義穀并七八兩年勸修

文廟及創建書院各案內均經

奏蒙

恩准交部從優議敘在案今復於張家口修砌石道首先倡捐制錢二百餘千又勸捐制錢二萬二百餘

千竟能速成妥辦其勤求治理以民依爲重實屬
牧令中不可多得之員可否量加鼓勵之處出自
皇上天恩再前項工程係民捐民辦應請免其造冊報
銷謹

奏

道光九年十二月初八日奏

上諭那彥成奏官民捐修石道工竣請分別獎勵一摺
直隸萬全縣之張家口爲關疆要路該處上下兩堡
道路崎嶇行旅維艱經該縣知縣張慶成倡捐修辦
並選擇公正紳士向各商民勸捐於上年興工砌成

石道現已一律完竣據該督奏請分別恩施萬全縣知縣張慶成前於勸捐義穀及創修書院各案屢經交部從優議敘茲復修砌石道速成妥辦著加恩以應陞之缺陞用其捐數較多之張家口商總萬全縣民人馬驥山西民人余淦監生常秉周民人張大謨貢生常麒麟童生霍權均著賞給八品頂帶籍隸山西候選衛守備許漸達著交部議敘此項工程係官民捐辦著免其造冊報銷該部知道

道光十年四月初四日

奏爲各屬監倉及典史衙署委勘倒塌屬實動項修

整建復彙案恭摺奏

聞事竊照監獄爲羈囚重地倉廩乃積儲之區如逾十年保固限外坍塌例准動項修葺茲據藩司顏伯燾詳稱大城安州新安青縣井陘沙河曲周雞澤邯鄲大名保安懷來廣昌安平等十四州縣監獄均因年久失修歷被風雨摧殘非房屋歪斜卽墻垣敝裂磚瓦木料率多虧朽甚至倒塌傾圮亟應修整實係刻不可緩之工又撫寧容城高陽獻縣阜平贊皇懷來懷安廣平開州大名易州等十二州縣常平倉廩座井遵化易州二處

萬年倉廩亦因年久失修厯被大雨衝刷各廩房間圍
墻率皆坍塌敝裂難資積貯據各該州縣先後詳
請興修當經分案移行該管道府廳州親往勘明
實係坍塌應修并委員撙節估計監獄工料共估
需銀一萬四千六百六十兩七錢九分一釐倉廩
工料共估需銀一萬四千二百五十七兩九錢九
分六釐又文安縣典史衙署先行倒塌無存該典
史賃住民房相距監獄甚遠防範難週經前司移
委勘明會於道光五年保定府等處請修監獄案
內彙案

奏明辦理嗣奉工部議覆行令查明該處有無別項
要工分別覈辦等因復經移道飭據文安縣會同
委員保定縣逐加覈勘實係急應建復并聲明現
在該處並無別項要工估需工料銀一千三百七
十五兩四錢五分六釐以上監倉典史衙署三項
統共估需工料銀三萬二百九十四兩二錢四分
三釐彙案開單詳請具

奏前來

臣

查各屬監倉皆係緊要之工如遇限外倒

塌例准動項興修今大城等州縣監獄倉廩均逾
保固年限與請修之例相符其典史衙署既經倒

場無存賃住民房難資防範自應同應修監倉等
工一併准其估辦覆覈估需工料銀數尙屬無浮
合無仰懇

聖恩俯准動

帑興修如蒙

俞允

臣

卽飭藩司在於司庫耗羨銀款內照數動撥分

飭領同起緊修建仍造具估勘冊結分別銀數

題咨工竣委驗據實報銷飭取該管道府廳州親勘

急修印結並開具清單另行送部謹

奏

道光十年四月初七日奉

上諭那彥成奏請勦項修復各屬監倉及典史衙署一摺直隸大城等十四州縣監獄撫寧等十二州縣常平倉廩座并遵化易州二處萬年倉廩及文安縣典史衙署據該督查明應行分別修整建復共估需工料銀三萬二百九十四兩零著照所請准其在司庫耗羨銀款內照數動撥趕緊修建仍造冊題咨工竣委驗據實報銷該部知道

道光十年四月初九日

奏爲官民捐修城垣工竣恭摺奏懇

聖恩分別獎勵事竊查大名府城垣周圍八里十三步高三丈餘外磚內土自乾隆三十二年請項興修迄今六十餘年久逾固限日漸頽頽並因歷年風雨摧殘以致東門迤南及西門甕城外皮磚牆坍塌三段裏面土牆並海漫城樓等處蟄陷隙裂者亦不一而足上年四月間該府辛文祉到任查勘情形非及時修葺不足以壯觀瞻惟各項工程停綯未便遽請興辦當由該府稟商同城之大名道李德立各首先倡捐銀五百兩大名鎮總兵薛陸亦倡捐銀一百兩其餘同府屬之州縣均各倡捐

銀二三百兩不等並選擇公正紳士分頭勸捐各紳民亦俱踴躍急公先後共計捐輸銀一萬九千一百零五兩遴派紳民數人董理其事於上年八月購料集匠開工至十一月十三日一律修竣並於中樽節用度將四門石道及甕城廟宇營兵卡房一體修建其護城河前被漳水漫注淤墊亦據挑挖深通全工告竣稟經該道親履查驗委屬工堅料實飭據開造捐戶姓名銀數清摺請將捐輸最多之戶同在事出力之員分別獎勵由藩司覆

議請

奏前來臣查大名爲畿南重地自道光元年添鎮設
兵後經臣

奏添中營原因其界連豫東控制不可不嚴而城垣
尤應完整方資保障茲因年久未修坍塌過甚該
處紳民一經勸捐卽踴躍樂輸不數月間共捐集
銀一萬九千餘兩俾鉅工得以速竣洵爲地方義
舉殊堪嘉尙查定例修城築堤等項公事士民捐
輸銀三四百兩者據實奏請給予八品頂戴如業
有頂戴人員於奏請時聲明聽部另行議敘等語
今該紳民捐資修城除捐數在三四百兩以下者

另行分別賞給匾額花紅外惟天津府附貢生杜
兆斗大名縣廩生劉芹香民人耿東陽馮邁宗尤
士倬山東民人劉鍾舜保定府民人孫諫卿均各
捐銀三百兩又大名縣民人崔炳捐銀四百兩以
上八名均請

賞給八品頂戴至大名府知府辛文泚上年甫經到任
卽於巨萬要工力籌修辦首先倡捐銀五百兩而
又董勸有方得以費集工成實屬明幹有爲之員
應請

旨交部從優議敘大名道李德立亦倡捐銀五百兩大

名鎮總兵薛陞捐銀一百兩大名縣知縣蔣超曾
南樂縣知縣馬斯偉清豐縣知縣楊樸開州知州
張良志均各捐銀三百兩元城縣知縣胡無璜東
明縣知縣華濟長垣縣知縣李鈴均各捐銀二百
兩此外尚有督工委員大名府經歷張沅候補直
隸州州判敬承憲候補從九品朱紳候補未入流
劉世勲該員等或駐工彈壓或分段稽查均屬在
事出力之員一併仰懇

天恩交部分別議敘以示鼓勵此項城工係屬官民捐
辦請免造冊咨部報銷謹

奏

道光十年四月十二日奉

上諭那彥成奏官民捐修城垣請分別獎勵一摺直隸大名府城垣年久未修坍塌過甚經該道府等首先倡捐並選擇紳士分頭勸捐各紳民踴躍急公將要工一律修復完竣據該督查明官民捐輸銀數並在工作出力各員請分別獎勵著照所請所有捐銀三百兩之附貢生杜北斗廩生劉芹香民人耿東陽馮邁宗尤士倬劉鍾舜孫諫卿及捐銀四百兩之民人崔炳俱著賞給八品頂戴大名府知府辛文泚首先捐

辦董率有方著交部從優議敘大名道李德立大名
鎮總兵薛陞大名縣知縣蔣超曾南樂縣知縣馮斯
偉清豐縣知縣楊樸開州州判張良志元城縣知縣
胡憲璜東明縣知縣華濬長垣縣知縣李鈴及督工
委員大名府經歷張沅候補直隸州州判敬承憲候
補從九品朱紳候補未人流劉世勲俱著交部分別
議敘此項城工均係官民捐辦著免其造冊報銷該
部知道

道光十年七月初四日

奏爲勘明磁州邯鄲二州縣地震坍塌文武衙署倉

監緊要各工奏懇

聖恩俯准動項興修事竊查磁州一帶地震情形及動

撥銀兩委員查辦撫卹各事宜節經

臣先後

奏蒙

聖鑒并聲明各項工程分別緩急次第估辦各在案茲據大名清河二道飭委天津府同知顧汝壽將磁州邯鄲二州縣文武衙署倉廩監獄馬號等緊要工程逐一勘明撙節估計由藩司顏伯燾數明詳請具

奏前來

臣

查磁州邯鄲二州縣文武衙署爲聽政辦

公之所倉厥攸關積貯監獄羈禁罪囚均係刻不
可緩之工既據該道等委員勘明磁州衙署除閒
房刪除外實應辦公棲息房間并科房馬號等項
估需工料銀五千四百零七兩九錢二分州判衙
署估需工料銀七百一十四兩學正衙署估需工
料銀六百一十五兩六錢訓導衙署估需工料銀
六百三十九兩一錢二分吏目衙署估需工料銀
六百九十五兩一錢六分都司衙署估需工料銀
一千九百八十八兩四錢彭城鎮千總衙署兵房
估需工料銀一千一百九十四兩在城千總衙署

兵房估需工料銀一千一百九十四兩至該州監獄雖係甫經修竣之工惟值此異災震塌與承修不實迥異似難仍論保固自應一併動項興修現估工料銀一千四百零四兩一錢六分八釐常平倉廩一座估需工料銀三千三百三十九兩六錢以上磁州衙署監倉等工共估需工料銀一萬七千一百九十一兩九錢六分八釐又邯鄲縣衙署并科房馬房等項估需工料銀二千二百四十九兩四錢一分二釐典史衙署估需工料銀三百九十七兩教諭衙署估需工料銀二百一十二兩八

錢八分訓導衙署估需工料銀二百九十五兩三錢九分二釐千總衙署估需工料銀四百七十七兩六錢常平倉廩估需工料銀二千四百三十三兩其監獄亦前因坍塌估需銀九百九十六兩一錢八分二釐彙同大城等州縣監倉等工

奏准動項修辦今工未修竣復又震塌據續估銀四百九十七兩七錢二分應請卽照續估銀數找撥修辦仍俟工竣同原估銀兩併案估銷以上邯鄲縣衙署倉監等工共估需銀六千五百六十三兩零統計該二州縣估需工料銀二萬三千七百五

十四兩九錢七分二釐實係坍塌應行趕緊修復
之工覈其所估工料銀數摺節無浮相應奏懇
聖恩俯准動項修葺俟奉

旨允准卽在於司庫地糧項下照數動撥給發該州縣
領回趕緊購料修葺事竣委員驗收如有草率偷
減情事並卽據實叅辦至震塌各廟及忠義節孝
等祠宇攸關

祀典應俟衙署等工修竣後再行酌量輕重情形分
別估計辦理其橋座墩臺營房等工應緩俟來春
再爲勘辦其磁州南北二門城垣係屬往來通衢

自應早爲修葺業已飭令該州將迎面要工先行
勘估其餘該二州縣城垣甫經被震根脚浮鬆又
以塌陷下節土方尙難估計應請緩至數年之後
地脈結實再行勘估修辦並飭令將現估應修各
工造具估勘冊結分別

題咨謹

奏

道光十年七月初七日奉

上諭那彥成奏勘明磁州邯鄲二州縣地震坍塌文武
衙署各工請動項興修一摺直隸磁州邯鄲二州縣

本年夏間地震坍塌文武衙署倉監等工據該督勘明應行趕緊修復著照所請所有磁州各工共估需工料銀一萬七千一百九十二兩零邯鄲縣各工共估需銀六千五百六十三兩零統計該二州縣估需工料銀二萬三千七百五十四兩零准其在於司庫地糧項下照數動撥給發該州縣領回趕緊購料修葺工竣覈實驗收如有草率偷減卽據實叅辦

道光十年八月二十二日

奏爲承修張家口石土各壩及駐防營房工竣委員驗收並將在工出力人員量請獎勵事竊照上年

五月間萬全縣境張家口內外連次大雨各路山水漲發奔騰下注將大境門外石土各壩間段衝刷經臣飭司委員勘明被衝石土壩工共估需銀四萬四千八百七十四兩零又衝塌駐防兵房估需工料銀二千七百七十九兩零分案奏蒙

諭旨允准興修並聲明俟今歲春融開工興辦在案嗣據署宣化府知府沈濤萬全縣知縣張慶成具報於本年閏四月間先後辦理完竣當將壩工劄委口北道綽勒恭額前往確勘驗收去後茲據呈稱查得該縣承修張家口大境門外第一二段暨第

五段石壩并第三團蒙古營房前土壩等工按段丈量俱係照估如式修辦完竣並無偷減草率等弊該令并將未經估辦之第六段埋頭捐資修整又於新築石土之外堆積土牛俾盛漲之時藉資掩護辦理甚爲妥速等情又准察哈爾都統武忠額咨稱張家口左翼營房工程完竣已委右翼協領哲敏前往驗收委係料實工堅等因到臣並據藩司顏伯燾覈明該縣張慶成承辦石土各壩及營房等工同時並舉及早截工又復捐辦埋頭積聚土方能以公事爲重殊堪嘉尙請

奏明鼓勵前來臣查張家口石壩外捍水患內衛旗民保障隄防最關緊要而又地處極寒春末方能地土融化夏令山水卽至辦工之期甚促該縣張慶成承辦此工豫備料物籌畫週詳臨時多僱人夫親身督辦計開工至工竣爲期不過兩月經理尙稱妥速茲已確勘驗收工程亦俱堅實且捐資辦理善後尤爲計慮周詳洵屬直隸牧令中出色之員查該員前於道光六年捐辦義穀並七八兩年捐修

文廟及創建書院節經奏請從優議敘復於上年捐修

石道案內奏奉

恩准以應陞之缺陞用并於

大計案內保薦卓異各在案可否仰懇

聖恩賞加知州銜以示鼓勵之處出自

皇上天恩其候補知府沈濤係

臣

上年奏委督辦之員

今年委署宣化府篆就近督飭調度有方萬全縣

縣丞陶希葛幫同照料亦屬勤奮相應

奏明請

旨交部議敘以獎微勞謹

奏

道光十年八月二十五日奉

上諭那彥成奏承修張家口石土各壩及駐防營房工竣請將在工出力人員量加獎勵一摺直隸張家口大境門外石土各壩前因被水衝刷並衝塌駐防兵房經該督奏准興修茲據查明現已工竣驗收所有承辦此項工程之萬全縣知縣張慶成經理妥速又復捐辦土方尙爲出力著賞加知州銜候補知府沈濤督飭有方萬全縣縣丞陶希葛幫同照料均屬勤奮俱著交部議敘以示獎勵該部知道

道光十年八月二十二日

奏爲請修大道橋工以利文報行旅事竊照大道橋
梁損壞地方官例應查明修理茲據獻縣知縣郎
若曾稟報該縣城北滹沱河向有臧家橋一座自
道光三年請項修理以來迄今已逾七載樁梁板
片漸多虧朽並未損折本年閏四月初旬上游水
勢陡漲洶湧異常致將迎水樁衝折二根掣動大
梁全橋閃裂若不急爲拆修設有傾圮於文報商
旅殊多關礙稟經臣批飭河間府委據交河縣知
縣唐維釗會勘明確實係被水衝激損傷過重必
須拆卸大修方資鞏固共估需工料銀二千九百

十七兩零造冊出結由藩司顏伯燾覈明詳請具
奏動項修辦前來臣查獻縣減家橋係七省衝衢大
道往來車馬絡繹不絕既據該府委員勘明衝折
屬實亟應修整覆覈所估工料銀兩尙無浮冒應
請准其動項興修以利文報而便行旅如蒙

俞允所需工料銀兩飭司在於地糧項下動撥給發領
回興工仍俟事竣委員驗收覈實造冊報銷並取
具估勘冊結另行

題估再查前項木橋係該前縣白明義於道光三年
承修雖曾出具保固印結送部但石橋保固例限

十年木橋非石橋可比固限自應遞減况驟被大水衝激以致損折更與無故坍塌不同未便責令原辦之員賠修謹

奏

道光十年八月二十五日奉

上諭那彥成奏請動項修理橋工一摺直隸獻縣臧家橋係七省衝衢大道據該督查明自道光三年修理以來已逾七載樁梁漸多虧朽近被河水衝折自應及時修整所有估需工料銀二千九百十七兩零著准其在於地糧項下動撥給發該督卽督飭該府縣

三才圖會卷之二十一 雜考
名
趕緊興辦毋任浮冒工竣委員驗收覈實造冊報銷
該前縣白明義承修前項木橋與石橋保固例限不
同著免其賠修該部知道

道光十年九月初三日

奏爲新添大名鎮中營武弁應需衙署請

旨動項建蓋以資棲止事竊查大名鎮屬向止左右兩
營前因存城兵少奏奉

諭旨裁汰天津水師營參將守備以下官兵改設大名
鎮中營遊擊一員守備一員千總二員把總三員
經制外委三員額外外委六員馬步守兵七百名

以備操防所有新添各員弁應需衙署當經飭鎮會同大名道遵照

題准條款查勘地基估計工料開單詳辦去後茲據該鎮道督飭大名府委員南樂縣大名縣移會營員查勘大名府城人烟稠密民間空房隙地無多僅就空閒官基勘明應建衙署地面除額外界委例無衙署外請建中營遊擊衙署一所守備衙署一所千總衙署二所把總衙署三所經制外委衙署三所並請添建前次未經議及之中營軍器庫一所火藥局一所箭亭二處撙節確估共需工料

銀九千九百八十一兩二錢開單出結呈由府道
送司經藩司顏伯燾覈明詳請具

奏動項興建前來

臣

查衙署爲各員弁棲息辦公之

所必當照原議建造其軍器庫火藥局及箭亭或
收藏器械軍火或閱視校射亦係必不可省之工
自應同衙署准其一併添建以符營制而昭慎重
覈其估需各項工料尙屬無浮合無仰懇

聖恩俯准動項建葢如蒙

俞允

臣

卽飭令藩司在於節省馬乾項內照數動撥給

發大名縣領回購料興工責成大名鎮道督飭建

蓋務期工堅料實如有草率偷減據實叅辦仍俟
工竣驗收造冊報銷以昭覈實並飭造估勘冊結
另行具

題謹

奏奉

硃批工部議奏

那文毅公二任直隸總督奏議卷六十六